

18.

1316 Nov. 15 Dietfurt ¹.

Wir Chunrat von Haslach sazzen ze geriht uf der trat ze Dytfürtte, als uns unser herre der Rômissch chûnich Ludewich daz lantgeriht in der grascheft ze Hirzperch enpholhen hat mit vollem gewalt, an dem nêhsten montage nach sand Martins tage. Do chom fûr uns der erbærig herre her Marquart von Hageln, gemainer phleger^a des gotshus ze Eystet, mit vorsprechen und auch ander erbærig leut, di dorfgeriht in der graschaft habent, und clagten, daz man in anders dæt von gerihtes wegen denne reht wær, und gert eins gemainen rehts wie ein lantrihter siniu reht suchen und voder^b solt in der grascheft und in irn dorfgerihten. Do wart ertailt uf den eyt von den eltsten rittern, di in der grascheft gesezzen und geerbet sint und gemainlichen gevolget und behabt, daz dehein lantrihter noch sin gewalt auf ymanst gut oder in ymanst dorfgeriht iht dehein sache versuchen solt, danne di im an offner schranne und mit rehter clage fûr praht werdent, on drei sache, umb diube, notnunft und umb tothshlege, swo er der mit der worheit geinnert wûrde in swelhem dorffe, an des selben dorffes rihter sol der lantrihter di selben schedelichen leut voder^b selbe oder mit sinen boten; und sol auch denne der selbe dorfrihter im die selb schedilichen læut antwûrten oder sinen boten fûr daz valletor ongeværd also gevangen, irm gut doch on schaden. Und sol der lantrihter uber irn leip rihten als reht ist. Uber dis urtail gerten si brief, die wûrden in ertailt und geben in si^c ze einem offen urchûnde mit des vorgeanten lantgerihts insigel versigelt.

Der ist geben do man von Christes geburt zalt driu-
zehenhundert jar und dar nach in dem sehtzehenden jar
an dem vorgeschriben montage.

19.

1346 Jan. 15 Nürnberg ².

Wir Ludweich von gotes genaden Rômisscher keiser,
ze allen zeiten merer des reichs, bekennen offentlich mit

a) 'pheger' Kop. b) 'vadern' Kop. c) So Kop.

1) Kopialbuch fol. LXVIII¹ sq. Rubrum: 'Sentencia in iudicio provinciali obtenta'. 2) Kopialbuch fol. CXXI. Rubrum: 'Instrumentum imperatoris pro defensione Iudeorum'.